



partii naleraq

UKA 2016/033-01

11-10-2016

Meeqqat atuarfianni ilinniusiat (atuartitsissutit) qaffasissusaanik Naalackersuisut misissueqqullugit peqquneqarnissaanik Inatsisartut aalajangiiffigisassaattut siunnersuut. Misissuinermit inerniliussaq UKA2017-imi saqqummiunneqassaaq.

(Inatsisartunut ilaasortaq Suka K. Frederiksen, Siumut)

Meeqqat atuarfianni ilinniusiat (atuartitsissutit) qaffasissusaanik Naalackersuisut misissueqqullugit peqquneqarnissaanik Inatsisartunut ilaasortap Suka K. Frederiksen-ip aalajangiiffigisassaattut siunnersuutaa Partii Naleraq sinnerlugu imannak oqaaseqarfigissuarput:

Aallaqqaasiullugu Partii Naleraq sinnerlugu oqaatigissuarput, siunnersuutip uuma itingartinneqarnissaanut akissaqanngitsugut.

Tassami maannamut ukiorpassuannortuni meeqqat atuarfianni atuartitaamikkut angusaasartut ataatsimut isigalugit qanoq malunnaatilimmik pitsanngoriaateqarsimannginnerisa pisariaqartippaat, pimoorussinerulluta ajornartorsiutaasunik qaangiiniarnissamut suliniutaasinnaasut tamaasa atorlugit meeqqat atuarfianni angusaasartut pitsaanerulersinneqarnissaat pingaarnerpaanut ilaatillugit suliarisariaqarivut.

Naalackersuisut akissuteqarnerminni ilaatigut oqaatigaat ilinniusiorfiup 2002-p kingorna atuakkat 637-t saqqummersissimagai.

Taamaakkaluartoq aperisariaqarpugut, naak taakku meeqqat atuarfianni meeqqat karakteriinut pitsannguutaasumik kinguneri ?

Isumaqarpugut tamakku tamarmik nalilersorluartariaqalersut, taamatut ingerlaannartoqarsinnaangilaq.

Atuartitaaneq ilinniartitaanerlu kalaallit kulturitsinnut oqaatitsinnullu naleqquttunngorlugu aaqqissuunneqartariaqartoq aamma pissusisamisoornerpaajussooq atuartitaaneq ilinniartitaanerlu nunatsinni innuttaasut ulluinnarni atugaat aallaavigalugit ingerlanneqarpat.

Partii Naleqqamiit erseqqissaatigissuarput, ilinniartitaanerup soorunami qaffasissumik angusaqarfiulluarmillu ingerlanneqarnissaa pisariaqartipparput pingaartillugulu.

Kisianni maannamut meeqqat atuarfianni angusarineqartartut appasippallaarnerisa qaffassarneqarnissaat pillugu aaqqiiniarnerit ukiorpassuannngortuni eqqartorneqartut aamma peqataaffigisavut, sooq maannamut malunnaatilimmik pitsanngoriaateqanngillat ?

2000-ikkut aallartilaarneranni atuarfitsialammik taallugu misiliisoqaraluarpoq, isumalluangaarluta atuarfitsialak taperserparput, taammaattutsialaaguni immaqa angusatigut iluaqutaasinnaammat ?

Kisianni aamma atuarfitsialaaniaraluartoq kiisa maanga killippugut, allaat nunani europamiittuni misilittakkat atorneqarsinnaanerit eqqartuiffigilerlutigu.

Atagu piffissanngunnginnerluni avammut saannginnitsinni uatsinnut qiviaqqaalaarnissarput ?

Tassami inuusuttuaqqat atuarfimmiik anisartut amerlavallaarput ilinniaqqiffiusinnaasunut ingerlariaqqinneq ajortut, ilaatigut meeqqat atuarfianniit angusarineqartut naammagineqarneq ajormata.

Aperisariaqalerpugut, sooruna meeqqat atuarfiinni meerartatta karakteritigut angusaat taama pitsaanngitsigisut ?

Tamatta Eqeertariaqalinnginnerluta ?

Apeqquutillu assigiinngitsut qulaarlugit eqqartortariaqalinnginnerlutigit ?

Tassami eqqartortariaqarparput, qanoq ililluta atuartitaaneq ilinniartitaanerlu nunatsinnut, kulturitsinnut oqaatitsinnullu naleqqunnerusoq atuutilersissaneripput ?

Ilami taanna qulequtaq apeqqutaasariaqanngikkaluarporluunniit !

Piviusunngortinneqarnissaa pimoorullugu naammassiniaannartariaqarpoq !

Tassami kikkulluunniit inuiaat atuartitaanikkut ilinniartitaanikkullu aaqqissuunneqarsinnaanngikkaluarmata inuiaat allat kultur-iat oqaasiilu aallaavigalugit.

Taama naatsumik oqaaseqarlunga siunnersuutip aappassanneerpeqannginnerani kultureqarnermut ilinniartitaanermullu ataatsimiititaliami suliarineqarnissaa inassutigaarput.

Anthon Frederiksen